

بِسْمِ اللَّهِ الرَّحْمَنِ الرَّحِيمِ

# KHUTBA JUMMAH

HAZRAT MUHYI-UD-DIN AL-KHALIFATULLAH

*Munir Ahmad Azim*

25 Décembre 2015 ~  
(13 Rabi'ul Awwal 1437 Hijri)

## **(Résumé Khutba)**

***Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hadhrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite fer troisième partie de so Khutba Jummah lors « Fêtes Fin d'Année »:***

Couma zot tous conné, l'année 2015 pé tire à sa fin. Nous tous pé vivre bane derniers jours de l'année 2015 et le mois de Décembre bientôt pé alle terminer. Le mois de Décembre c'est aussi ene mois ki connu comme mois de festivité. Majorité bane dimounes pense pou faire bane célébrations et reste dans l'amusement. Le Gouvernement, secteur privée, zone l'industriel et plusieurs compagnies organise bane fêtes fin d'année et aussi en familles organise fête Noël (azordi Noël) et fin d'année.

Dans ene situation pareil, ene musulman bizin prend précaution pou préserve so la foi, et pas abandonne l'enseignement l'islam et le model parfait Hazrat Muhammad (saw). Li pas défanne pou déjeuner ou diner entre camarades et collègues de bureau, de n'importe ki travail (ki *Halal* pour ene musulman), mais li strictement défendue pou ene musulman ki li associer li avec bane kitchoses ki défendue. Surtout dans bane fêtes fin d'année kot ena boisson alcolic ki servi sans aucaine limites, kot ou bane camarades dire ou ki : « *azordi faire nous ene ti plaisir et l'année pé terminer, ene l'année nous fine travail ensemble ; azordi faire nous plaisir, boire ene ti la santé* », et alors ou oublier commandements Allah et alle faire camarades plaisir.

Eski ou trouvé ki dans la boisson alcolic ou gagne la santé ou ? Ou sois sa pé faire ou détruire ou la santé ? Ene ti verre la boisson alcolic, vine 2 verres et li augmenter aller même kot ou trouve ou ki entre ou et bane là pas ena aucaine différence. Ou fine rentre dans ene piège ki bien grave aux yeux d'Allah. Ene l'année de bane bon action ki ou fine faire pou la cause d'Allah : Namaz, Zikr, *duah*, Telawat Quran, pendant Ramadhan ou fine observe le Roza, ou fine faire toute sorte kalité sacrifices dans le mois de Ramadhan et ou fine prend part dans *Qurbani* et ou bane frères et sœurs fine faire boucou de sacrifice pou accomplir le 5<sup>ème</sup> pilier de l'islam (Hajj). Astère ene seul coup ou brûle ou bane *Néki* (bon actions) avec la boisson alcolic, avec cigarette, avec pétard et ou

rentre dans zot Séga, kot avec bane soulaizon ou commence danser, chanter, kot ou remplace sa bane mauvais kitchose là dans place *Ibaadat*.

Bane madames et filles musulmanes ki travail bizin prend bien bél précaution pou ki zot pas rentre dans sa piège là zot aussi et consomme bane nourriture *Haraam*. Pas rentre dans sa bane vices là ; seul vice ki péna so tourne-à-vice sa. Bane madames et filles musulmanes prend bien précaution kot dans sa fête là, li mixe et là-bas péna *Pardah*. Alle réfléchi un peu : pou vine masjid, faire Namaz en congrégation, Jummah zot trouve sa *Haraam* et saki zot pou participe dans zot travail fête fin d'année là, li pas *Haraam* sa ? Eski sa *Halal* sa ? Sa bane soi-disant Mullah là, bane grand défenseurs de l'islam, zot pas faire narien pou protège dignité et l'honneur de nous bane frères et sœurs musulmans pou pas tombe dans sa bane pièges là? Bien souvent nous trouve bane parents autorise zot bane zenfants (filles et garçons) pou alle dans bane célébrations de fin d'année. Zot retourne la caze tard ou même zot passe la nuit en dehors avec bane étrangers, tellement pé amuser dans sa bane fête fin d'année là. Tellement zot amuser, zot commence abuser, rentre tard ou sois ene nuit dehors dans l'amusement kot péna Namaz di tous.

Nous tous conner ki ici à Maurice vers la fin de l'année même ki ena grand l'examen finale pou bane l'école primaire, secondaire, même l'université, kot bane ki travail dure pendant ene l'année avec l'examen finalement ki pou conne résultat de zot zeffort kot si zot passer, zot change classe, et bane zenfants primaire, celui ki passe CPE pou classer pou gagne le meilleur collège et pou collège, celui ki fine réussi dans Form 5, SC (School Certificate) avec distinction et crédit li pou alle faire H.S.C (Higher School Certificate) et bane H.S.C ki passer, kot ena tellement briyan kot zot sortie lauréats.

Mais dans nous la vie aussi, sa mois décembre là, Allah (swt) faire ene grand l'examen avec ou la foi ; ene coté ena la tentation de tous sorte kalités et l'argent brûler inutilement, ena gaspillage. Alors dans sa bane situations là, sa vine ene teste pou ou, bane croyants. Eski ou pou rentre dans sa bane fêtes fin d'année là ou sois ou pou fer le maximum pou passé dans sa grand l'examen de la spiritualité là ? Eski ou pas ti pou content ki ou passe ou l'examen de la foi avec distinction, kot tentation de Shaytaan fail ? Pareillement, dans sa bane jours de fin d'année là, ene croyant ki sincère envers so la foi en Allah et en le Saint Prophète Hazrat Muhammad (saw) et bane l'enseignements de l'Islam, alors pou li l'enseignement divine ki gagne le grand succès avec distinction, kot Allah et So Rassool (saw) so l'enseignement vine priorité lors tous bane tentations non-islamique dans sa bane jours de fin d'année là.

Donc, comme le Khalifatullah de sa siècle là, mo faire ene l'appelle à zot tous en générale et particulièrement à tous bane musulmans, même zot pas croire dans moi, pas faire narien, mais préserve zot la foi, pas détache zot avec Allah et So Rassool (saw) à cause sa bane kalités fêtes de fin d'année là kot boucou z'affaires *Haraam* dérouler. Pendant sa période de fin d'année là, nous trouve aussi boucou musulmans oublier zot *Deen* et sans aucaine hésitation zot dirige zot vers bane places *Haraam*, comme discothèques, casinos (et bane les autres kalité jeux de hasard), et sonne boucou pétard, car tous sa bane choses là, zot *Haraam* etc.

Pas alle faire sa bane actions là kot sa attire la colère d'Allah lors ou et kot Allah (swt) capave enlève tous bane *Barakat* dans ou l'argent, dans ou la caze etc., et ou pas conné ki bane jours ki pé vini, ki fine réserver pou ou ! Passe sa grand l'examen fête de fin d'année pou ki so résulta ki vine de coté d'Allah faire ou gagne distinction partout, kot dans bane jours ki pé vini kot ou la caze, et ou la vie de tous les jours, et la vie famille transformée en *Jannat* (Paradis) lors sa la terre là même et ou sauve ou avec sa l'enfer ki fine réserver lors la terre ici-bas là et aussi l'enfer de l'au-delà. Bane parents bizin conne zot responsabilité et faudré pas ou donne permission à ou bane zenfants pou bane sorties vers bane places *Haraam*. Bane musulmans bizin pas mette zot lipié dans sa bane place *Haraam* là, sa bane place là pas pou bane croyants, c'est pou seulement bane ki pas croire dans l'unicité d'Allah, Allah So Rassool (saw) et So Livre ki Li fine parfaire.

Pas gaspille ou l'argent ki ou fine gagner la fin l'année : Salaire, Bonus, 13<sup>ème</sup> mois etc. Ou conner commié sa coûte le pays sa ? Kan fine fini donne ou sa, ou bien content mais eski ou conner couma le pays pou récupère sa bane l'argent là si ou pas fine conne économiser, ou fine gaspille tous ? Bé zot pou tire sa avec nous-mêmes ! Avant donne ou, ou réaliser et guetté ki kantité kitchoses bien cher. Avant ou fine gagne l'argent là, ou guetté avec précaution ki kantité l'argent ou bizin pou tire ou ration tous les mois, guette prix légumes incroyable, prix pommes d'amour ki prix pé vender demi kilo, la viande, poisson, poulet etc. – Bane kitchoses de baze ki dimounes servi tous les jours : di riz, de l'huile, du lait, du sucre, mo capave aller même, la liste là pou trop long et de coté transport bus, prix l'essence etc., vraiment boucou bane ti dimounes, et bane dimounes moyen, tous pé souffert. Pas guette bane grand péto là ou ! Zot tous zot pé gagner dans plateau, zot pas conne sa souffrance là zot ; zot pé jouir bane privilèges, et pou zot, la fin l'année zot l'argent ki rentré pou zot plusieurs fois plisse ki sa ene mois en plus ki ou fine gagner là ! Pense un peu kan l'année terminer ena la rentrée l'école après plisse ki 1 mois de vacances, ou bizin trouve l'argent pou acheter tous bane zaffaires scolaires pou ou bane zenfants, pou zot bane livres et uniforme kot tout sa là coûte énormément.

Mo conne très bien céki mo pé dire là, pas pou faire plaisir à sa bane responsables ou bane l'autorité. Avec sa bane fêtes de fin d'année là, li malheureux aussi pou dire façon l'habillement de bane madames et filles musulmans ki pé travail pas bon du tout. Pense bien, mo pas pé cause tous bane madames et filles musulmanes. Ene très faible pourcentage parmi zot ki garde zot dignité, l'honneur et dignité et l'honneur de sa la religion l'islam là.

Donc bane madames musulmanes bizin habille convenablement et avec respect. L'honneur c'est ene kitchose ki pas vendé dans bazar. Alors, kan ou habille indécent sous prétexte ki pé faire chaud, ou ki c'est ene période de fête, abé li vraiment déplorable. Si vraiment ou prend ou ki ou ene musulman et ou croire dans Allah et So Rassool, alors ou bizin conne garde l'honneur et dignité de sa vrai l'enseignement de l'islam là et faudré pas ki ou associer ou à bane activités de Shaytaan. Rappelle bien ki bane activité pareil attire la colère d'Allah et sa attire calamité lors ou.

Alors nous faire *duah* ki Allah (swt) éloigne nous avec sa bane tentation Shaytaan la. *Insha-Allah, Ameen.*